

分門纂類唐歌詩殘本

澳門葡國歷史研究


七

草木蟲魚類卷第七

趙孟奎 分門纂類

唐歌詩九十五

木一



松

孤松

古松

老松

小松

偃松

賣松

買松

栽松

松聲

雜題

古栢

病栢

新栽栢

古杉

移杉

栽杉

檜

雙檜

矮檜

桂

孤桂

雙桂

小桂

紅桂

桂子

雜題

松木

李嶠

鬱鬱高巖表森森幽澗陲鶴棲君子樹風拂大
夫枝百尺條陰合千年蓋影披歲寒終不改多
節幸君知

無可

枝幹怪鱗皴煙梢出澗新屈盤高極月蒼翠遠
驚人待鶴移陰過聽風落子頻青青寒木外自
與九霄隣

陸肱

雪霜知勁質今古乞嘉名斷砌盤根遠踈林偃
蓋清鶴栖何代色僧老四時聲鬱鬱心彌久煙

高萬井生

王叡

寒松聳拔倚蒼岑綠葉扶疎自結陰丁固夢時
還有意秦皇封日豈無心常將正節栖孤鶴不
遣高枝宿衆禽好是特凋群木後護霜凌雪翠
踰深

盧士衡

雲外千尋好性靈伴杉陪栢事孤貞招呼暑氣
終無分應和涼風別有聲細雨灑時花旋落道
人食處葉重生如逢郢匠垂搜採爲棟爲梁力

不輕

李山甫

地聳蒼龍勢抱雲天教青共衆材分孤標百尺
雪中見長嘯一聲風裏聞桃李傍他真是佞藤
蘿攀爾亦非群平生相愛應相識誰道脩篁勝
此君

翁承贊

倚澗臨溪自屈蟠雪花銷盡鮮花乾幽枝好折
爲談柄入手方知有歲寒

廖匡圖

曾於西晉封中散又向東吳作大夫濃翠自知
千古在清聲誰道四時無枝柯偃後龍蛇老根
脚盤來瓜距麤直待素秋搖落日始將凡木鬪
榮枯

脩睦

細韻颼颼入骨涼影兼巢鶴過高墻盤根一種
依平地自是梧桐不久長

成文幹

大夫名價古今聞盤屈孤貞更出群將謂嶺頭
閑得了夕陽猶挂數枝雲

山中松

張鼎

聳枝碧雲端根侵蘚壁盤幾經良匠顧猶作散
材看雪積花開少風多子落乾空存後凋色歲
晚出林巒

松樹

元稹

華山高憧憧上有高高松株株遙各各葉葉相
重重槐樹夾道植枝葉但冥蒙旣無貞直幹復
有冒掛蟲何不種松樹使之搖清風秦時已曾

種顚顚種不供可憐孤松意不與槐樹同閑在
高山頂摎盤虬與龍屈爲大廈棟庇蔭侯與公
不肯作行任俱在塵土中

和

白居易

亭亭山上松一一生朝陽森聳上參天柯條百
尺長漠漠塵中槐兩兩夾康莊婆娑低覆地枝
榦亦尋常八月白露降槐葉次第黃歲暮滿山
雪松色鬱青蒼彼如君子心秉操貫冰霜此如
小人面變態隨炎涼共知松勝槐誠欲栽道傍

糞土種瑶草瑶草終不芳尚可以斧斤伐之爲
棟梁殺身獲其所爲君構明堂不然終天年老
死在南崗不願亞枝葉低隨槐樹行
題左張松樹

宋之問

歲晚東巖下周顧何悽惻日落西山陰衆草起
寒色中有喬松樹使我長歎息百尺無十枝一
生自孤直

新秦郡松樹歌

王維

青青山上松數里不見今更逢不見君心相憶
此心向君君應識爲君顏色高且閑亭亭迥出
浮雲間

孤松篇

劉希夷

蟬月桑葉青鶯時柳花白澹艷煙雨滋敷芬陽
春陌如何秋風起零落從此始獨有南澗松不
歎東流水元陰天地冥皓雪朝夜零豈不罹寒
暑爲君留青青好顏色落落任孤直群樹
遙相望衆草不敢逼靈龜卜真隱仙鳥宜棲息

恥受秦帝封願言唐侯食寒山夜月明山冷氣
清清淒芳歸風集吹之作琴聲松子卧仙岑寂
聽凝野心清冷有真曲樵採無知音美人何時
來幽逕委綠苔吁嗟深澗底弃捐廣厦材

華山孤松

張蠩

石罅引根非土力冒寒猶助岳蓮光綠槐生在
膏腴地何得無心拒雪霜

冬日題興善寺崔律師院孤松

劉得仁

爲此踈名路頻來訪遠公孤標宜雪後每見憶
山中靜影生幽蘚寒聲入迥空何年植茲地曉
夕動清風

孤松吟 酬渾贊喜

盧綸

深山荒松板雪壓半離披朱門青松樹萬葉乘
清露露重色逾鮮吟風似遠泉天寒香自發日
麗影長圓陰郊一夜雪榆柳皆枯折迴首望君
家翠蓋滿瓊花捧君責松曲自顧同衰木曲罷
不相親深山頭白人

商山臨路有孤松往來所以爲口好事者憐
之編竹成援遂其生植感而賦詩

柳宗元

孤松停翠蓋託根臨廣路不以險自防遂爲明
所誤幸逢仁惠重意此藩籬護猶有半心存時
將承雨露

古松

齊己

雷電不敢伐鱗皴勢萬端蠹依枯節死蛇入朽
根盤影浸僧禪濕聲吹鶴夢寒尋常風雨夜應

有鬼神看

題流溝寺古松

白居易

煙葉蔥蘢蒼塵尾
霜皮駁落紫龍鱗
欲知松老看塵壁
死却題詩幾許人

和薛監察題興善寺古松

張喬

種在法王城
年深有古名
瘦根盤地遠
香吹入雲清
鶴動池臺影
僧禪雨雪聲
看來人旋老
因此歎浮生

古松感興

皇甫松

皇天后地力使我向此生貴賤不我均若爲天
地情我家世道德旨意匡文明家集四百卷獨
立天地經寄言青松姿豈羨朱槿榮昭昭大化
光共此遺芳馨

老松

孫魴

鬱鬱復蒼蒼秋風韻更長空心應有口老葉不
知霜子落生深澗陰清背夕陽如逢東岱雨猶